

Gwo ma Musa jin 'Kwara A'di jin Ta jin Twa/a/ mo jin Yuku Gway ka Takwiin

1 Ka muŋ'kup mo tani Arumgimis ukki momis dhali mony'cesh mo. ²Dhali mony'cesh a'di 'cethki'da 'thintha/ mo dhali di bwa 'te/ mo, dhali mondhurumi'd a'di wupki'da apo/ mo jin 'kula'kul mo. Dhali Shi/in ma Arumgimis a'di wukurki'd apowa ris kumma/ yi'de/ mo.

³Dhali Arumgimis ki o gwo mo ki: Dhalki moŋkush piyi'd mo. Dhali moŋkush diki'd mo. ⁴Dhali Arumgimis parki moŋkush e ki a'di 'bora'bor mo. Dhali Arumgimis ki kwa/ moŋkush bwa 'peni mondhurumi'd mo. ⁵Arumgimis ki yuk moŋkush ki Montee mo dhali mondhurumi'd yuka a'di ki Mon'thiny mo. Dhali mom'pimpili/ diki'd mo dhali mon'thamo/ diki'd mo, a'di jin ta'da cim 'de/ mo.

⁶Dhali Arumgimis ki o gwo mo ki: Dhalka balany di'd mo ibwaman kumma/ yi'de/ mo dhali dhalki a'di kwa/a'da ris kumma/ yi'de/ bwa mo 'pena ris kumma/ yi'de/ mo. ⁷Dhali Arumgimis ki uka balany mmokwa/a ris kumma/ yi'de/ bwa mo, uni kun 'kokin e bwaŋ'kwariny ma balany 'pena ris kumma/ yi'de/ mo, uni kun 'kokina powa balany mo. Dhali uni 'kokin kan mo. ⁸Dhali Arumgimis ki yuka balany ki Momis mo. Dhali mom'pimpili/ diki'd mo dhali mon'thamo/ diki'd mo, a'di jin ta'da cim su/ mo.

⁹Dhali Arumgimis ki o gwo mo ki: Dhalka ris kumma/ yi'de/, uni kun 'kokin e bwaŋ'kwariny momis mo minu tul isi montal 'de/ mo e mon 'de/ mo, dhali dhalki moŋkuthu'd piyi'd mo. Dhali a'di waki'd kan mo. ¹⁰Arumgimis ki yuk mo jin kuthaku'th ki Mony'cesh mo, dhali aris yi'de/ gwansan kun tulu isi montal 'de/ mo tani yukkina a'di gway ki Kumma/ Yi'de/ mo be. Dhali Arumgimis ki par a'di e ki a'di 'bora'bor mo. ¹¹Dhali Arumgimis ki o gwo mo ki: Dhalka 'cesh 'ka to ale/ ki

ton dhii/in mo, to kun minu si kun mini dho'th maman ki emen buni mo, dhali cwa kun mini dho'th maman ki emen buni kun cinu uni mo, uni 'baar ka 'deṭe/ 'deṭe/ isi ki e jin 'ko uni ki she/ ki she/ kuku/ mo, apo/ mony'cesh mo. Dhali a'di waki'd kan mo. ¹²Mony'cesh a'di dho'thki ton dhii/in kun 'kana le/ mo, to kun sinu mo kun dhodhi maman mo isi ka ḵa'bany buni kun 'kona e uni ki she/ ki she/ mo, dhali cwa kun dho'thki maman ki emen buni ki she/ ki she/ kun cinu uni mo, uni 'baar ki isi e kuku/ mo. Dhali Arumgimis ki par a'di e mo ki a'di 'bora'bor mo. ¹³Dhali mom'pimpili/ diki'd mo dhali mon'thamo/ diki'd mo, a'di jin ta'da cimi kwara mo.

¹⁴Dhali Arumgimis ki o gwo mo ki: Dhalki moṅkush uni i'kon eya balany gi momis mo mmoḵwa/ montee bwa 'peni mon'thiny mo. Dhali dhalki uni ta jamas mii mo dhali goma yir mo dhali goma tee mo dhali gom yil mo, ¹⁵dhali dhalki uni kushi mo mo 'pena balany gi momis mo mmoçi moṅkusha po/ mony'cesh mo. Dhali a'di waki'd kan mo. ¹⁶Dhali Arumgimis ki uḵ dhan moṅkush kun caaca isu/ mo, a'di jin ta dhan moṅkush jin caaca mmoji mo jin yuḵu ki montee mo, dhali a'di jin boça is ka kamu/ mmoji mo jin yuḵu ki mon'thiny mo. A'di uḵki'da risa cul si'da/ mo. ¹⁷Dhali Arumgimis ki dhu uni eya balany gi momis mo mmoçi moṅkush buni apo/ mony'cesh mo, ¹⁸mmoji mo jin yuḵu ki montee mo dhali apo/ mon'thiny mo, dhali mmoḵwa/ moṅkush bwa 'peni mondhurumi'd mo. Dhali Arumgimis ki par a'di e mo ki a'di 'bora'bor mo. ¹⁹Dhali mom'pimpili/ diki'd mo dhali mon'thamo/ diki'd mo, a'di jin ta'da cimi doṅon mo.

²⁰Dhali Arumgimis ki o gwo mo ki: Dhalka ris yi'de/ dhodhona risa waambuhany to/e kun uḵu mo, dhali dhalka ris 'dii pena apo/ mony'cesh mmo'ciṭṭi ka 'ciṭṭan dhul apowa balany gi momis mo. ²¹Wakan Arumgimis ki uḵ dhan to kun 'kon e ḵumma/ yi'de/ kun caaca mo dhala ris to kun 'kon ki e kun ḵalki ya ka bor mo, uni kun 'tu'dki yi'de/ isi ki em buni kun 'ko uni kuku/ mo, dhala ris 'dii kun 'kan ma bi mo isi ki em buni kun 'ko

uni kuku/ mo. Dhali Arumgimis ki par a'di e mo ki a'di 'bora'bor mo. ²²Dhali Arumgimis ki 'bor uni mii mo, mmo/o gwo mo ki: Dhodhi maman mo, dhali mari is mo dhali 'tu'di aris yi'de/ ki piny piny mo e bwam uni kun ta kumma/ yi'de/ mo, dhali dhalka ris 'dii mar is apo/ mony'cesh mo. ²³Dhali mom'pimpili/ diki'd mo dhali mon'thamo/ diki'd mo, a'di jin ta'da cim ma mudhe'd mo.

²⁴Dhali Arumgimis ki o gwo mo ki: Dhalki mony'cesh dhodho'da ris to kun 'kon ki e kun uku mo isi ki em buni kun 'ko uni kuku/ mo: bip dhali to kun parana 'cesh mo dhali tombwaasho mo kun 'kon e mony'cesh mo isi ki em buni kun 'ko uni ki she/ ki she/ kuku/ mo. Dhali a'di waki'd kan mo. ²⁵Dhali Arumgimis ki uk tonyuk kun 'kon e mony'cesh mo isi ki em buni kun 'ko uni ki she/ ki she/ kuku/ mo dhali bip isi ki em buni kun 'ko uni ki she/ ki she/ kuku/ mo, dhali aris to kun parana po/ mony'cesh isi ki em buni kun 'ko uni ki she/ ki she/ kuku/ mo. Dhali Arumgimis ki par a'di e ki a'di 'bora'bor mo.

²⁶Dhali yan'ko'd Arumgimis ki o gwo mo ki: Dhalki ana uka wathi/ en'thi/ mo ki jamas bana mo, mmowa e ki jamas bana mo, dhali dhalki uni ta gi mom'bi'th mo apo/ yi'de/ kun 'kon e bwan kumma/ yi'de/ mo, dhali apowa ris 'dii kun pen e mis mo, dhali apo/ bip mo, dhali apowa ris mony'ceshi 'baar mo, dhali apowa ris to/e kun parana 'cesh mo, uni kun parkin apo/ mony'cesh mo. ²⁷Wakan Arumgimis ukki wathi/ en'thi/ mo ki jamas pitin gana/ mo, ki jamas ma Arumgimis gana/ mo tani a'di i/ukkina a'di a'di mo. A'di jin ta wathin gwath mo dhali a'di jin ta wathim 'bomi mo, uni i/ukkina a'di mo. ²⁸Dhali Arumgimis ki 'bor uni mii mo, dhali Arumgimis ki o uni gwo mo ki: Dhodhi maman mo, dhali mari is mo, dhali 'tu'di mony'cesh mo, dhali dili a'di abora 'cesh mo, dhali tayi gi mom'bi'th apo/ to yi'de/ gi kumma/ yi'de/ mo dhali apowa ris 'dii kun pen e mis mo, dhali apowa ris to kun 'kon ki e kun kalki ya apo/ mony'cesh mo. ²⁹Dhali Arumgimis ki o gwo mo ki: Hili mo mo ma, aha/ cikina um aris emen

to kun minu si mo kun mini dho'th mo uni kun 'kokin apo/ bwam/e gi mony'ceshi 'baar mo, dhali arisa ka'bany cwa ki maman buni ki she/ ki she/ mo. Um mini bu'th uni haali/ uni mini ta tonte/ gom um mo. ³⁰Dhala ris tonycuḡ gi mony'cesh mo dhali aris 'dii kun pen e momis mo dhala ris to kun parana po/ mony'cesh mo, dhali aris to kun shi/irin kun 'kon ki e mo tani aha/ cikina aris ton dhii/in kun minu si gom tonte/ mo. Dhali a'di waki'd kan mo. ³¹Dhali Arumgimis parki aris to/e kun ukkina a'di mo, dhali hili mo mo ma, a'di 'bora e ki 'bor mo. Dhali mom'pimpili/ diki'd mo, dhali mon'thamo/ diki'd mo, dhali a'di ta'da cim ma pe'de/ mo.

2 Wakan momis dhali mony'cesh uni 'baarkunu mo dhali aris to kun 'koni bwaman uni mo. ²Dhali ka cim ma pesu/ mo tani Arumgimis 'baarki miim piti jin miikina a'di mo, dhali a'di ki si is ka cim ma pesu/ 'pena ris miin tom piti kun miikina a'di mo. ³Wakan Arumgimis ki 'bora cim ma pesu/ mii mo dhali kar a'di ki she/ ki dhelel dhelel mo, haali/ eya cim ma pesu/ yan mo tani Arumgimis ki si is mo 'pena ris tom piti kun miikina a'di ki uk jin ukkina a'di to mo.

⁴Uni gwansan itana nyaḡum yil ki momis mo dhali mony'cesh mo me'd jin 'konu mmo/uk uni mo be.

Ka tee jin uḡa Tapa Arumgimis mony'cesh mo dhali momis mo tani ⁵ki to jin sinu e mombunto piyi'd e mony'cesh naskina/ mo dhali to jin miinuwa 'tash 'koki 'ko e bunto mo mmo'ka/a le/ naskina/ mo — haali/ Tapa Arumgimis diki dhal uniya sho'k bway mo mmohetha po/ mony'cesh mo, dhali wathimpa en'thi/ piyi'd mmoḡora 'cesh mo. ⁶Hili jasa shile/ a'di icuki mis 'peni mony'cesh mo dhali ya'th bwam/e gi mony'cesh ki japem piti mo — ⁷dhali yan'ko'd Arumgimis ki 'dikil wathimpa en'thi/ 'peni bu'da'cesh mo, dhali pi shi/in e shush piti, shi/in jin di ki e mo dhali wathimpa en'thi/ warki'd ki jin di ki e mo. ⁸Dhali Tapa Arumgimis thosonki bwaagon e Idin, e mom'pesho'k mo dhali e mun mo a'di ki kar wathi/ jin ukkina a'di icine/ mo. ⁹Dhali 'pena 'cesh mo tani Tapa Arumgimis ki kara

'cesh jin mina cwa 'ka a'diya po/ mo, aris cwa 'baar mo kun 'bora'bor kun minu hil mo dhali kun 'boron kun minu shwa maman 'peni nycine/ mo. Dhali cwa gi mondiki/e si'da/ di'd e bwaman ma goŋ mo dhali cwa jin minu nyith to jin 'boro'd dhali jin shiyi'd diki'd si'da/ mo.

¹⁰Yi'de/ guski'd 'peni bwaman ma goŋ ma Idin mo, a'di jin wolki'd e bwaagoŋ mo dhali a'di kwa/kunu bwa mo mmo'ko 'kusi doŋon mo. ¹¹Dhali gway gi yi'de/ jin ṭwa/a/ yuku gway ka Pishun mo, a'di jin guski'd mmokulum bampa/ gi Pam Hawiila isi 'baar mo e mo jin 'kokina 'dolkon gana/ mo. ¹²Dhali 'dolkon gana/ gi mony'cesh yan mo tani uni 'bora'bor mo. Dhala 'bica wasin dhela/ dhala wasin dhela/ jin ta'da jamas kush mo uni 'kokin mo. ¹³Dhali gway kumma/ yi'de/ jin 'kon ma po/i su/ mo tani yuku gway ka Jihun mo, a'din tal 'de/ jin guski'd mo mmo'kama 'cesh gi Paŋ Kush is mo. ¹⁴Dhali kumma/ yi'de/ jin 'kon ma po/i kwara mo tani a'di yuku gway ka Hiddaagil mo, a'di jin guski'd 'kupki mom'pesho'k ki Pan Ashshuur mo. Dhali yi'de/ jin 'kon ma po/i doŋon mo yuku gway ka Elpuraat mo.

¹⁵Dhali Tapa Arumgimis ki bu'th wathimpa en'thi/ mo mmokar a'di e bwaagoŋ ma Idin mmokorki a'di mo dhali mmokar a'di mo. ¹⁶Dhali Tapa Arumgimis kanki wathimpa en'thi/ gwo mo mmo/o gwo mo ki: /E mini shwa aris cwa gi bwaman bwaagoŋ 'bakany mo ¹⁷hili cwa jin minu 'bi'th e ki miim 'boro'd mo dhali ki mii shiyi'd mo tani /e mini dhalki a'di ki shwa mo, haali/ ka tee jin mina /e shwa a'di mo tani /e mini wu mo be.

¹⁸Dhali yan'ko'd Tapa Arumgimis ki o gwo mo ki: A'di diki 'bor mmokar wathimpa en'thi/ a'di 'de/ kan mo. Aha/ mina mii uḳ ki a'di amanwoth, a'di jin midi gam ki a'di mo. ¹⁹Wakan 'pena 'cesh mo tani Tapa Arumgimis ki uka ris tombwaasho mo dhali aris 'dii kun pen e momis mo, dhali a'di ki 'doyu uni wathimpa en'thi/ mmohil mo ki a'di midi yer uni gway mo, dhali ma gway gunn kun yerkina wathi/ to/e kun uḳkunu mo kun 'ko ki e mo tani a'di ita gway kun yeru uni mo.

²⁰Wathi/ en'thi/ ki ɕi aris to/e gway 'baar mo dhali aris 'dii kun pen e momis mo dhali aris tombwaasho mo. Hili gom wathi/ en'thi/ mo tani wathi/ piyi'd jin gamkunu jin midi woṯṯ a'di, a'di jin midi gam gom a'di mo. ²¹Wakan Tapa Arumgimis ki dhal mo jin 'ce'du e kagahara mmobiṯa po/ wathimpa en'thi/ mo, dhali ki a'di di'di mmo/ish e mo tani a'di bu'thki'da simaṇ gwar tal 'de/ 'peni a'di mo dhali a'di ki 'dapki buṇṅwar is ki shuman 'twa/ mo. ²²Dhali 'pena simaṇ gwar jin bu'thkina Tapa Arumgimis 'peni wathiṇ gwaṯṯ mo tani a'di ki uḵ a'di mmota a'bom mo dhali guya yim e wathiṇ gwaṯṯ mo. ²³Dhali yan'ko'd wathiṇ gwaṯṯ ki o gwo mo ki:

Hayyiye ayaase ita'da simam pema
dhali buṇṅwar is ki shuman is pema.
Ayim minu yuḵ gway ka A'bom mo,
haali/ ayim a'di bu'thkunu 'peni Wathiṇ
Gwaṯṯ mo.

²⁴Dhali gom gwo gi wakan mo tani wathiṇ gwaṯṯ midi dhal com 'pen mo dhali kum mo dhali 'dap is piti me'd ki ash mo dhali uni su/ warkina buṇṅwar is ki isa 'de/ mo. ²⁵Dhali wathiṇ gwaṯṯ dhali ashim piti mo tani uni 'ko ki is 'te/ mo dhali uni 'kona is ki 'theya 'the mo.

3 Dhali tasha/ a'di kora e ki kor mo mmobola ris tombwaasho kun uḵu mo, uni gun uḵkina Tapa Arumgimis mo. A'di ki owa 'bom gwo mo ki: A/Arumgimis o gwo mo ki: Um mini mii dhalku/ cwan tal 'de/ ki shwa 'peni bwaagoṇ 'te/o? ²Dhala 'bom ki thoḵ tasha/ gwo mo ki: Aman dhalu bway mmoshwa aris maman cwa gi bwaagoṇ mo. ³Hili Arumgimis ki o gwo mo ki: Um mini mii dhalku/ ki shwa maman cwa jin di'd e bwaman gi bwaagoṇ mo, walla dhalku/ ki ta a'di is ki me'd mo gom isi ciki/ um mini wu mo. ⁴Hili tasha/ ki owa 'bom gwo mo ki: Um mini wu mo yisa. ⁵Haali/ Arumgimis mishki'd ki um mini shwa a'di mo tani em bum minu ɕa'd mo dhali um mina e wa ka Arumgimis mo mmonyith jin 'boro'd dhali jin ta thus ki thus mo. ⁶Wakan ka 'bom ki par cwa e ki a'di 'bora'bor mmoshwa mo, dhali a'di 'kunya'kuny e jis/em piti mo,

²⁰Wathi/ en'thi/ ki ɕi aris to/e gway 'baar mo dhali aris 'dii kun pen e momis mo dhali aris tombwaasho mo. Hili gom wathi/ en'thi/ mo tani wathi/ piyi'd jin gamkunu jin midi woṯṯ a'di, a'di jin midi gam gom a'di mo. ²¹Wakan Tapa Arumgimis ki dhal mo jin 'ce'du e kagahara mmobiṯa po/ wathimpa en'thi/ mo, dhali ki a'di di'di mmo/ish e mo tani a'di bu'thki'da simaṅ gwar ṯal 'de/ 'peni a'di mo dhali a'di ki 'dapki buṅgwar is ki shuman 'twa/ mo. ²²Dhali 'pena simaṅ gwar jin bu'thkina Tapa Arumgimis 'peni wathiṅ gwaṯṯ mo tani a'di ki uḱ a'di mmota a'bom mo dhali guya yim e wathiṅ gwaṯṯ mo. ²³Dhali yan'ko'd wathiṅ gwaṯṯ ki o gwo mo ki:

Hayyiye ayaase ita'da simam pema
dhali buṅgwar is ki shuman is pema.
Ayim minu yuḱ gway ka A'bom mo,
haali/ ayim a'di bu'thkunu 'peni Wathiṅ
Gwaṯṯ mo.

²⁴Dhali gom gwo gi wakan mo tani wathiṅ gwaṯṯ midi dhal com 'pen mo dhali kum mo dhali 'dap is piti me'd ki ash mo dhali uni su/ warkina buṅgwar is ki isa 'de/ mo. ²⁵Dhali wathiṅ gwaṯṯ dhali ashim piti mo tani uni 'ko ki is 'te/ mo dhali uni 'kona is ki 'theya 'the mo.

3 Dhali tasha/ a'di kora e ki kor mo mmobola ris tombwaasho kun uḱu mo, uni gun uḱkina Tapa Arumgimis mo. A'di ki owa 'bom gwo mo ki: A/Arumgimis o gwo mo ki: Um mini mii dhalku/ cwan ṯal 'de/ ki shwa 'peni bwaagoṅ 'te/o? ²Dhala 'bom ki thoḱ tasha/ gwo mo ki: Aman dhalu bway mmoshwa aris maman cwa gi bwaagoṅ mo. ³Hili Arumgimis ki o gwo mo ki: Um mini mii dhalku/ ki shwa maman cwa jin di'd e bwaman gi bwaagoṅ mo, walla dhalku/ ki ta a'di is ki me'd mo gom isi ciki/ um mini wu mo. ⁴Hili tasha/ ki owa 'bom gwo mo ki: Um mini wu mo yisa. ⁵Haali/ Arumgimis mishki'd ki um mini shwa a'di mo tani em bum minu ɕa'd mo dhali um mina e wa ka Arumgimis mo mmonyith jin 'boro'd dhali jin ta thus ki thus mo. ⁶Wakan ka 'bom ki par cwa e ki a'di 'bora'bor mmoshwa mo, dhali a'di 'kunya'kuny e jis/em piti mo,

dhali cwa a'di iminu o bwa mmokar jan tal 'de/
mmoyuka yuk mo tani ayim ki bu'th maman cwa mo
dhali shwa a'di, dhali ayim si'da/ ki ciki a'di ka kathim
piti mo, dhali a'di shwaki'd mo. ⁷Dhali yan'ko'd uni su/
ka'dkunu em buni mo, dhali uni su/ mishki mo mo ki
uni 'ko ki is 'te/ mo, dhali uni ki sho 'cemena pu/
mmontal 'de/ mo dhali uni ki uka rompa/ 'peni 'cemena
pu/ gom is buni mo.

⁸Dhali uni cikki is gi Tapa Arumgimis mmoyakina
a'di e bwam ma goṇ e mom'pimpili/ jin 'thup ma tee
she/ mo, dhali wathin gwaṭh dhali ash uni bagki is buni
'peni buṇ'kus gi Tapa Arumgimis mo e bwanycwa gi
bwaman gi bwaagoṇ mo. ⁹Hili Tapa Arumgimis yukki
wathi/ mo dhali o a'di gwo mo ki: /E dini mana?
¹⁰Dhali a'di ki thoḵ gwo mo ki: Aha/ cika is jin gwo /e
e bwaman ma goṇ mo, dhali aha/ ko/kina is mo, haali/
aha/ dina is 'te/ mo, dhali aha/ bagkina is pem mo.
¹¹A'di o gwo mo ki: Kaja itor /e gwo mo ki /e di is
'te/a? Ki /e ishwaki cwa jin kanka/ /e gwo mo ki: /E
mini mii dhalku/ a'di ki shwa mo? ¹²Dhali wathi/ ki o
gwo mo ki: A'bom a'di jin cikina /e mmonyak ca'b ki
aha/ mo tani ayim a'di iciki aha/ maman cwa mo dhali
aha/ shwakina a'di mo. ¹³Dhali yan'ko'd Tapa
Arumgimis ki owa 'bom gwo mo ki: Katinta sa/ jin
miikina /e mo? Dhali a'bom ki thoḵ gwo mo ki: Tasha/
a'di imu'thki aha/ e mo dhali aha/ shwakina a'di mo.

¹⁴Dhali Tapa Arumgimis ki o tasha/ gwo mo ki:

Haali/ gom miim pini jin miikina /e kansan
tan mo tani

monyjeem pini boli'da ris to/e kun uku e ki
shi/ mo

dhali apowa ris to/e kun 'koni bwaasho
'baar mo.

Dhali ka bor pini mo tani /e mini para bora
'cesh mo,

dhali bu'da'cesh mina /e shwa mo
ka risa tee gi mondiki/em pini 'baar mo.

¹⁵Aha/ mina kar mo jin dupu i bwaman /e
mo dhala 'bom mo,

dhali e bwaman emen pini mo dhali emen
ma yim mo.

A'di midi pwath /e 'kup pini mo

dhali /e mini tikina tikilam piti ka ulmany
mo.

¹⁶Eya 'bom mo tani a'di ki o gwo mo ki:

Isa nyor dho'th pini gom uci mo tani miga/
mar is kagahara gom /e mo.

/e mini dho'th uci ki isa nyor i e mo,

hili bwam pini mini mii o ka kathim pini mo

dhali a'di midi ta tapa apo/ /e mo.

¹⁷Dhali a'di ki owa Aadam gwo mo ki:

Gom miim pini jin cika /e 'twa/ gi ashim
pini mo

dhali shwa cwa yansan jin kanka/ /e gwo

mo ki: /E mini mii dhalku/ ki shwa

a'di mo tani

mony'cesh jeenu mo gom /e mo be.

Aris to kun mina /e shwa mo tani uni mina

/e gam 'peni mii jin mina /e 'kosha

shir shir mo ka tee gi mondiki/em pini

'baar mo.

¹⁸A'de/ dhala lit uni mini 'ka gom /e mo,

dhali /e mini shwa to kun sinu 'peni bunto
mo.

¹⁹/E mini shwa tonte/ ki jiti/ bwam/em pini
mo

ntagi /e mini dok ki bu'da'cesh ka

nya'ko'd,

haali/ 'peni bu'da'cesh mo tani /e

bu'thkunu mo be.

/E ta bu'd gana/ mo,

dhali e bu'da'cesh mo tani /e mini dok ki

a'di ka nya'ko'd mo.

²⁰Dhali wathi/ ki yuk ash gway ka Hawwa mo, a'di
jin ta 'pemen gwo jin onu ki: To jin di'd ki e mo, haali/
ayim ta'da ata'da ma ris to 'baar kun 'kon ki e mo.

²¹Dhali Tapa Arumgimis ki uk ka Aadam dhali gom

ashim piti burrinye/ 'pena yi'c mo, dhali hi'thki uni i is mo.

²²Dhali yan'ko'd Tapa Arumgimis ki o gwo mo ki: Hili mo mo ma, wathi/ a'di wakina e ki jan tal 'dem bana mo, mmomish jin 'boro'd dhali jin ta thus ki thus mo. Dhali shwane/ isi ciki/ ki a'di midi kar me'd piti dhali bu'th cwa gi mondiki/e si'da/ mo dhali shwa a'di mo dhali a'di midi ca'b ki e ki sule/ sule/ mo. ²³Dhali gom gwo gi wakan mo tani Tapa Arumgimis ki kar a'di 'pen ka pije/ 'peni bwaagon ma Idin mo, mmoya kora 'cesh ki me'd piti mo 'peni mo jin bu'thkunu a'di 'peni cine/ mo. ²⁴A'di ki ur wathi/ ka pije/ mo dhali e mom'pesho'k gi bwaagon ma Idin mo tani a'di ki dhu karubiim kun ta iman'doyu gwo mo dhali gandal jin kaaka jin shwa'd ki o'd ki bar bar mo a'di jin tu'kki'd ki washar washar 'ban kuku/ mo, mmoji bway gi maman cwa jin di ki e mo.